



# AWIG-AWIG

## DESA ADAT MAS



DESA MAS

KECAMATAN UBUD. KABUPATEN GIANYAR

## PENYARCAN DAGING AWIG-AWIG

SARGA I	: Aran Palemahan Desa miwah dasar lan tetujon. ....	3
Palet 1	: Aran Palemahan Desa. ....	3
Palet 2	: Dasar lan tetujon. ....	4
SARGA II	: Sukerta tata Pakraman. ....	4
Palet 1	: Krama. ....	4
Palet 2	: Prajuru. ....	7
Palet 3	: Paruman. ....	9
Palet 4	: Kukul. ....	10
Palet 5	: Druwen Desa. ....	11
Palet 6	: Leluputan. ....	11
Palet 7	: Karang. ....	12
Palet 8	: Kasucian lan Kasukertan Desa. ....	13
Palet 9	: Dusta,bahaya lan lalumburan. ....	14
Palet 10	: Wicara. ....	16
SARGA III	: Sukerta tata Agama. ....	17
Palet 1	: Kahyangan. ....	17
Palet 2	: Kawikon utawi Guru Leka. ....	20
Palet 3	: Tunon/Setra miwah Atiwa-tiwa. ....	21
SARGA IV	: Sukerta tata Pawongan. ....	23
Palet 1	: Tata Treptining Pawongan. ....	23
Palet 2	: Busana Adat. ....	24
Palet 3	: Ngerorod/Ngerangkat. ....	24
Palet 4	: Pawarangan miwah Pakaluwarga. ....	26
SARGA V	: Pamidanda lan Rerampagan. ....	28
Palet 1	: Pamidanda. ....	28
Palet 2	: Rerampagan. ....	29
SARGA VI	: Pararem miwah Pasuaran. ....	29
SARGA VII	: Pemuput. ....	30
PAWEWEH	: Keputusan DPRD Bali No : 10 Th 1952. ....	32

**PIDAGING**  
**MAKA BANTANG AWIG – AWIG**  
**DESA PAKRAMAN MAS**

---

SARGA I : Aran Palemahan Desa miwah dasar lan tetujon.

Palet 1 : Aran Palemahan Desa.

Palet 2 : Dasar lan tetujon.

SARGA II : Sukerta tata Pakraman.

Palet 1 : Krama.

Palet 2 : Prajuru.

Palet 3 : Paruman.

Palet 4 : Kukul.

Palet 5 : Druwen Desa.

Palet 6 : Leluputan.

Palet 7 : Karang.

Palet 8 : Kasucian lan Kasukertan Desa.

Palet 9 : Dusta, bahaya lan lalumburan

Palet 10 : Wicara.

SARGA III : Sukerta tata Agama.

Palet 1 : Kahyangan.

Palet 2 : Kawikon utawi Guru Leka.

Palet 3 : Tunon/Setra miwah Atiwa-tiwa.

SARGA IV : Sukerta tata Pawongan.

Palet 1 : Tata Treptining Pawongan.

Palet 2 : Busana Adat.

Palet 3 : Ngerorod/Ngerangkat.

Palet 4 : Pawarangan miwah Pakaluwarga.

SARGA V : Pamidanda lan Rerampagan.

Palet 1 : Pamidanda.

Palet 2 : Rerampagan.

SARGA VI : Pararem miwah Pasuaran

SARGA VII : Pemuput

## **OM AWIGENAM ASTU**

Pengaksamaningulun Ri Pada Paduka Bethara Hyang Mami Sang Ginelaring Sapt  
Mhara Dipanam Mantram, Hredaya Sumilayem, mewastu tan Ketumahana Ulun ri  
Upadrawa tulah pamidi, angerencana Awig – awig Desa Pakraman Mas, Jagatdhitayem.

## **OM SIDHIRASTU**

## **OM AWIGNAMRASTU**

Pakulun paduka Bethara manusanta angardana pada Sang Hyang mogi – mogi tan  
keneng Upadrawa, maka mangalaning angarcane Awig –awig, lama kena amangguh  
Dirgayusa.

Awig – awig puniki maka panuntun Adat Desa Pakraman mangda prasida  
amangguh dharma prakerti, Sudha sudhaning bakti lawan mukti.

Sane punika dasar awig – awig puniki kang inucap Tri Hita Karana, mekadi:

1. Prahyanan : Sehanan Panyiwian Desa genah ngarcanayang maka  
atenan Desane.
2. Palemahan : Tanah pakuwuban saha pedagingnya sinanggeh angga  
sarira taulan Desane.
3. Pawongan : Warga Desa sami pawakan Tri Kaya Parisudha, mawinan  
Desane sida melah maprawerti.

Sapunika pengastutin sakatahing pada Krama Desa Adat Mas, wit sakeng laksana  
ngerencana Awig – awig maka sepat siku-siku, pemargin Desa adat, dumadak amangguh  
kejagatdhitan.

***OM SANTI, SANTI, SANTI OM.***

**SARGA I.**

**ARAN PALEMAHAN DESA MIWAH TATUJON.**

**PALET 1.**

**Aran Palemahan Desa.**

**PAWOS 1**

1. Desa adat puniki mewastu : Desa Adat Mas.
2. Jimbar kakuwub wewidangannya mewates nyatus Desa :
  - a. Wates sisi Kangin : Carik Juga/Tukad Celong.
  - b. Wates sisi Kelod : Carik Bantas.
  - c. Wates sisi Kauh : Tukad Bengbeng.
  - d. Wates sisi Kaja : Carik Bramasa

**PAWOS 2**

Kakuwub wewidangan Desa Adat Mas puniki manut Dresta luwire :

- a. Pupulan Karang Paumahan, sinaggeh Palemahan Desa Pakraman.
- b. Setra, Carik miwah Tegal ring kakuwub wewidangan Desa, rawuhing Palemahan Desa Pakraman manggeh Telajakan Desa.

**PAWOS 3**

Desa adat Mas puniki dados 8 ( Kutus ) Banjar Suka Duka, tur suang-suang Banjar Suka Duka patut mekarya Awig-awig, Pararem miwah Pasuaran Banjar nanging tan dados lempas sedagingin Awi-awig Pararem Pasuaran Desa Adat, saha taler patut kalingga tanganin antuk Kelihan Desa Adat, maka pikukuh dumugi pelaksana.

Pepalihan Kutus ( 8 ) Banjar Suka Duka inucap inggih punike:

1. Banjar Suka Duka Batanancak.
2. Banjar Suka Duka Tegalbingin.
3. Banjar Suka Duka Tarukan.
4. Banjar Suka Duka Kawan.
5. Banjar Suka Duka Juga.
6. Banjar Suka Duka Satria.
7. Banjar Suka Duka Kumbuh.
8. Banjar Suka Duka Bangkilesan.

**PALET 2**

**Dasar lan Tatujon**

**PAWOS 4**

Desa Adat Mas puniki ngemanggehang dasar:

1. Tri Hita Karana manut Tatwaning Bhuana Agung
2. Tri Lingga Sesana, Inggih Punika:
  - a. Nista.
  - b. Madya.
  - c. Utama.
3. Pancasila sekadi munggah ring pamungkah Undang-undang Dasar 1945

**PAWOS 5**

Luwir tatujon Desa Adat Mas Punike :

1. Mikukuh miwah ngerajegang Sang Hyang Agama.
2. Nginggilang Tata Prawertining Magama.
3. Ngerajegang kasukertan Desa saha Pawongannya sami sekala niskala.
4. Ngerajegang Tata Sangaskaraning Pawongan sane ngiket Pakula Wargan.
5. Ngerajegan kasukertan seraya druwening Desa miwah druwening Pawongan sami

**SARGA II**

**SUKERTA TATA PAKRAMAN**

**PALET 1**

**Krama**

**PAWOS 6**

1. Sehananing Sang Jenek paumahan ring wewidangan Desa Adat Mas, sinanggeh Wong Desa Adat Mas.
2. Sajaba punike sinanggeh Tamiyu.
3. Sang sinanggeh Tamiyu punike yening jenek ring wewidangan Desa Adat Mas, masuwe 3 ( Tigang ) rahina patut nguningayang ring I Kelihan Dinas, tur kesarengin antuk sang kadunungan nyihnayang indik pemargine gumanti sakeng medasar becik saha sane kepastika antes.

4. Yaning Tamiyu punike nganutin kadi dasar-dasar ring ajeng, wenang I Prajuru Desa miwah Kelihan Banjar, ngaonan I Tamiyu punike ngelisang sane nampi kadunungan.
5. Yaning wenten silih tunggil Krama Desa nampi padunungan, miwah ngundulang jadma sakeng siosan Desa, sane ten nganutin pakertan Banjar/Desa, patut nampi padunungan kakenin pamidande manut pararem.
6. Yaning wenten sane kanggeh Tamiyu madunungan saha rabi ( Maparabian ) wenang Wong ika kantegin tedun makrama Banjar/Desa, nganutin Pararem-perarem Desa Adat Mas, yening wenten masuwe asasih mapadunungan.

### **PANOS 7**

1. Warga Desa sane sampun tedun makrama Banjar Suka Duka tedun memaksan Pura Khayangan Tiga miwah Pura Khayangan Manca Desa sinanggeh sampun syah mekrama Desa Adat Mas.
2. Yaning Sang sakeng siosan Desanya ngawit tedun mekrama Desa Adat, kadi inucap ring ajeng, patut kakenin ajug-ajugan akeh manut pah-pahan wiadin padum tegak.
3. Sane kemanggehang tegak manut, inucap ( 2 ) inggih punika:
  - a. Druwen Desa Adat sane marupa Jinah.
  - b. Druwen Desa Adat sane merupa Upon-upon Carik/Tegal.
  - c. Ramuan-ramuan wewangunan sane kacepong digelis jagi kekaryanin.
4. Indik ajug-ajugan punika anut ring Awig-awig miwah pasuaran Desa/Banjar suka duka/Pemaksan Khayangan Desa Adat.
- 5.

### **PANOS 8**

1. Ayah Desa Adat kadudonan dados 3 ( Tigang ) soroh:
  1. Ayah Pingarep ( Mekarang ).
  2. Ayah Ngemadenin ( Tan Pakarang ).
  3. Ayah Tapukan ( Mekarang/Tan pakarang ).
2. Sang sinanggeh ayah ngarep ring Banjar Suka Duka, ayah sane madruwe karang wit waris miwah gunakaya. Indik pawedal ring Desa krama sami napak.
3. Ayah ngemadenin punika, ayah sane nenten madruwe karang sakewanten sampun maparabi, kanton madunungan ring kuluwarganyane.
4. Indik ayah tanpa karang pawedalnyane ring krama Desa Adat, taler ngemadenin ( Atenga ) pawedal punika luwire:
  - a. Pawedal Jinah
  - b. Pawedal reramuan, miwah sane siyosan.

5. Indik pah-pahan pateh kadi sang ayah marep, rawuhing ayah sami napak.
6. Indik ayah tapukan, inggih punika ayah sane kejantenan :
  - a. Ayah balu muani
  - b. Ayah balu luh.
  - c. Ayah alit durung tutug yusa.
  - d. Ayah balu ngempu
7. Sang inucap ring ajeng ( 6 ) puniki nenten kakenanin ayah-ayahan ring Banjar Suka Duka/Pakraman Desa Adat, sakewanten pawedal-pawedal kakenanin manut pararem.

### **PANOS 9**

1. Wusan mekrama Adat Desa Adat Mas katatarin antuk :
  - a. Padem.
  - b. Lan mapitahu ring I Prajuru sakeng wewidangan Desa Adat Mas.
  - c. Kanoroyang ( Laad tan pakarana )
2. Yening wenten Krama Desa Adat madruwe putra Lanang/Istri sampun marabi tur sampun kawentenang upakara Widhiwidhana, patut di gelis masadok ring Kelihan Suka Duka, luwir pasadoke :
  - a. Putra sane keanggen bakal pawarisan ayah.
  - b. Putra sane nenten keangge pawarisan ayah.
3. Putra sane keangge pawarisan ayah nenten malih katedunin mekrama Banjar/Desa Adat.
4. Putra sane nenten keangge bakal pawarisan ayah, yan sampun maparabi katedunang makrama Banjar/Desa Adat, masengker asasih ngewentenang upakara Widhiwidhana, inggih punika ayah makarang miwah tan pakarang.
5. Kasuwen yening wenten Krama Banjar/Desa Adat ngentosang ayah patut kakenening pamidanda ngelus asukin ayah, akeh kidiknyane manut pararem.
6. Sang sane wusan makrama Desa Adat, majalaran sakeng kanoroyang antuk Banjar/Desa Adat, Banjar/Desa Adat wusan meweh pasayuban kasukertan sakaluwire marep ring Sang Kanoroyang tur kauningayang ring sang Rumawos ( Pemerintah ).
7. Yening sang magingsir reauh malih ke Desa Adat Mas tur mewali tedun makrama Desa Adat Mas, tur pecak ngewarisan pedum lan tetegenan ring santanannya wiadin Sang sane kasudi, patut I Krama Desa mewali nampi Sang Pecak megingsir punika, sakewanten taler kakenin pamidanda nganutin pararem, ngelus asukin ayah.

8. Yaning sang pastika nganoroyang malih mawali tedun makrama Desa Adat, patut keni pengajug manut pararem tur maduluran aci-aci guru piduka katur ring Khayangan Tiga ( Puseh, Desa, Dalem )
9. Yening wenten silih tunggil Krama Banjar Suka Duka jagi megingsir ngeranjing makrama Banjar Suka Duka miwah ngeranjing memaksan nenten kadadosan sedurung polih pamutus bawos saking Kelihan Banjar Suka Duka/Bendesa Adat utawi kadadosan yan sampun polih pamutus sakeng I Krama.

**PALLET 2**

**Prajuru**

**PANOS 10**

1. Desa adat puniki keenterang antuk Prajuru ring sor puniki :
  - a. Kelihan Desa Adat sane keabih antuk Wakil Kelihan Desa Adat.
  - b. Sejabaning punika taler kewentenan Juru Nyurat ( Penyarikan ) miwah Juru Raksa padruwen Desa mekadi Jinah miwah Peberana wiyadin sane kararemin antuk Krama Desa.
2. Sane dados kapilih madeg Prajuru Desa manut inucap ring ajeng inggih punika :
  - a. Sang sampun jenek tur ngeranjing mekrama ring Desa Adat Mas, sekirang-kirangnya masuwe tigang warsa, tur sumanggup kemadegang Prajuru Desa.
  - b. Mungguing yusa paling kidik Tigang Dasa warsa lan tur sampun maparabian.
  - c. Mangda uning nyurat aksara Bali miwah latin, uning memaca, Sadu tur Mewibawa miwah nenten Cedangga.
3. Sedurung kewentenang pamilihan Prajuru Desa, pinih riin kawentenan calon-calon Prajuru, Calon-calon kapastikayang :
  - a. Calon-calon sane sampun ka ajuang ring Banjar Suka Duka genahnya mebanjar.
  - b. Genep nagingin kadi inucap ring ajeng.
4. Prajuru-prajuru Desa adat kapilih sejeroning paruman Desa sane kamiletin olih I Krama Desa Adat sami, sejawaning halangan sane sampun kapitetes ring Kelihan Banjar Suka Duka inucap.
5. Ring paruman Desa inucap kapilih :  
Kelihan Desa Adat manut tata cara drestaning pemilihan Prajuru.

6. Yaning calon-calon Prajuru inucap ring ajeng akehang ring asiki, kawentenan pamilihan nganutin pasuara,
  - a. Sane polih suara pinih akeh , punike kaangge Kelihan Desa Adat.
  - b. Sane polih suara kedikan keangge penabih Kelihan Desa Adat kadi inucap ring ajeng.

## PANOS 11

Swadarmaning Prajuru Desa Adat :

1. Ngenterang Paruman-paruman Desa.
2. Ngenterang pelaksanaan sedaging Awig-awig, miwah mamutus sane marupa Pasuara miwah Pararem Desa.
3. Ngeraksa saha ngatur tatane ngangge sekancan Berana druwen Desa.
4. Nuntun tur ngenterang Krama Desa rawuhing Warga Desa sami ngupadi Kasukertan Sekala lan Niskala.
5. Nuntun saha nyaksinin tatacara sangaskaraning kauripang sane mabuat minakadi sane ngilitang Sulur-sulur Pakulawargan.
6. Nuntun saha I Warga Desa ngupadi nginggilang Sang Hyang Agama, Kasucian Palemahan, Kasucian Pawongan miwah ketata caraning ngangge Setra.
7. Mawosin kalih niwakin Pamutus marep ring wicaran Warga Desa, yaning wicara punika marupa wicara mabuat, tur nenten kabawos antuk Awig-awig, Pararem, miwah Pasuaran sadurunge meweh Pamutus, Prajuru Desa patut ngawentenang Paruman Prajuru saha kamiletin antuk Parisadha Hindu Dharma sane meweh tetimbangan-timbangan pamutus.
8. Ngewakilan Desa ring paruman sane siosan wiadin metuang bebawos ring sapa sira ugi.
9. Ngewentenang serah terima Paswadaruan, Padruwen Desa yadiastun merupa utang piutang, marep ring Prajuru Desa sane pacang ngentosin.
10. Wiadin sane siosan manut drestaning swadarmaning Prajuru Desa.

### **PANOS 12.**

1. Prajuru Desa kapilih nangken Limang Warsa
2. Prajuru Desa sane sampun telas warsa swadarmaning dados kacalonang malih, tur kapilih malih, yening Prajuru inucap nenten keberatan.
3. Yening sane kerariyanang wiadin sane nunas merarian punika I Kelihan Desa Adat, swadarmaning kelanturang antuk Prajuru sane siosan jumentos telas warsannyane.
4. Maka jalaran jagi keanggen dasar jaga nunas merarian dados Prajuru Desa yaning sapituduhipun sejeroning nglaksanayang swadarmaning Prajuru Desa nenten katitenin malih antuk I Krama Desa.

### **PANOS 13**

Olih-olihan wiadin pikolih I Prajuru Desa kambil sakeng druwen Desa inucap ring pungkur ( Pawos Sarga II Palet 5 ) sane akehipun kepastika manut Pararem Desa.

### **PALET 3**

#### **Paruman**

### **PANOS 14**

1. Paruman Krama Desa patut kawentenang ngangken ngetahun panemaning sasih Kedasa, segelis-gelisnya sesampun Tawur Kesanga.
2. Yaning indik mabuat, Paruman Desa dados kewentenang nenten manut sengker kadi ring ajeng.
3. Paruman krama desa taler kewentenang saking I Krama Desa.
4. Paruman Krama Desa patut kerawuhin antuk Krama Desa sami sane sinanggeh ayah marep, miwah ayah tanpa karang ( Ngemadenin ).

### **PANOS 15**

1. Sejawaning Paruman Desa, taler kawentenang paruman-paruman Prajuru Desa sekirang-kirangnya Tigang Sasih apisan.
2. Yaning wenten parindikan sane sinangguh mabuat, paruman Prajuru Desa dados kawentenang nenten manut sengker inucap ring ajeng.
3. Yaning wenten parindikan wicara mabuat, dados kawentenang paruman Prajuru Desa sane taler kamiletin antuk Parisadha Hindu Dharma, para Welaka, lan para Sulinggih tan manut sengker inucap ring ajeng.

*PALLET 4*

**Kulkul**

*PANOS 16*

Ring Desa Adat Mas wenten kekalih dudonan kulkul luwire:

1. Kulkul Desa, magenah ring Pura Desa, tur dados kasuarayang maka tengerang ring Desane sami ring tatkala:
  - a. Ngaturang Yadnya ring Pura Desa.
  - b. Paruman Desa.
  - c. Desa ngangken mekarya segerlahan.
2. Kulkul Banjar magenah ring suang-suang Banjar Suka Duka, manggeh tengerang :
  - a. Yadnya Desa/Banjar nuju mekarya.
  - b. Sinalih tunggil Warga Desa seda.
  - c. Warga banjar nglaksanayang pakaryan manut sane sampun kaarahang.
  - d. Wenten ala baya luwir ipun:  
Maling, Kaamuk, Kabegal, Kebaak, Paiyeg, Umah puwun, miwah Baya pati siyosan.
3. Tabuh manut dresta :
  - a. Kulkul tabuh lambat atulud cihna wenten paruman miwah mekarya sane sampun kearahang antuk Sinoman Banjar/Desa.
  - b. Kulkul tabuh lambat kalih tulud, cihna wenten Warga Banjar sane seda.
  - c. Kulkul tabuh bulus atulud, cihna paumahan Warga Banjar sane puwun, I Krama Banjar mapitulung saha makta bonjor miwah sane siyosan.
  - d. Kulkul tabuh bulus kalih tulud, cihna wenten dura cara, Maling, Cinaroda, I Krama Banjar makta Gegawan luwire: Tombak, Gegitik, miwah sane siyosan.
  - e. Kulkul tabuh bulus tigang tulud, cihna wenten dura cara sampun keni kejuk, tur sampun wenten Watang Tinggal.
  - f. Yaning silih tunggil wenten Warga Banjar nyuarayang kulkul tan manut kadi tatujon ring ajeng, wenang I Warga Desa/Banjar punike kakenenin pamidanda manut Pararem.
  - g. Yaning wenten sinalih tunggil Banjar nyuarayang kulkul ciri alabaya, patut segelisnya kesawurin antuk kulkul Banjar sane siyosan sewidangan Desa Adat Mas.
  - h. Tabuh-tabuh suaran kulkul sane sampun kapastika keanggen tengeran ring Desa/Banjar nenten dados ketabuhan siyosan ring tatujonnya.

**PALET 5**

**Druwen Desa**

**PANOS 17**

Sane sinanggeh druwen Desa, marupa kasugihan Desa Mas inggih punika:

1. Pecatu-pecatu miwah pelaba-pelaba Khayangan Tiga sejawanin Pura Manca Desa, daging hasil punika sami keanggen miara kerusakan ring Pura rawuhing piodalan sami ngepas.
2. Cacingkrem-cacingkrem.
3. Dadosan-dadosan utawi dadendan-dadendan.
4. Saluwiring dana punia.
5. Pawedal-pawedal sakeng Krama Desa.
6. Pikolih sakeng lianan, sane wit suci nirmala.
7. Utang-utang sane sampun kapastika antuk Krama Desa.

**PALET 6**

**Laluputan**

**PANOS 18**

1. Desa Adat Mas puniki meweh laluputan ayah wiadin pakenan-pakenan ring sang inggiling linggih, wiadin Sang sinanggeh Mekerti luwih ring Desa Adat Mas.
2. Sor singgih laluputan miwah bacakan sang kaunggahang ring pararem.
3. Sajabaning Prajuru Desa/Banjar, inucap ring ajeng, sane pastika patut polih laluputan pamekasnya :
  - a. Para Sadaka.
  - b. Para Pemangku Khayangan Tiga, miwah Pemangku Khayangan Manca Desa.
  - c. Sang sakit tahunan.
  - d. Wong cedangga banget.
  - e. Wong alit ubuh nyamput.

**PALET 7**

**Karang**

**PANOS 19**

1. Sahananing Karang Paumahan patut :
  - a. Pastika wenten bates-bates ipun.
  - b. Pamedal Karurunge wiadin Kemargane teges ipun nenten Kabebeng.
2. Prajuru desa patut ngutsahayang mangda Karange sami kawentenang mekadi ring ajeng, yaning pamedalnya marupa Rurung, mangda malinggah sekirang-kirangnya Adepa Belah.

**PANOS 20**

1. Sehanan Krama Desa patut ngewatesin Karangnya suang-suang, jantos sida trepti, nyatur desa.
2. Bates sane medampingan patut kategen olih sang madruwe karang sane makeluwan, wiadin maluanan manut dresta inggih punika :
  - a. Kaja.
  - b. Kangin.
3. Taru miwah wates inucap ring ajeng, kadruwe antuk sang negen wates inucap.

**PANOS 21**

1. Tanem tuwuh wewangunan sekaluwire, miwah tata ngange Karang tan wenang naonin miwah ngungkulin sane ngeranayang pocol wiadin ngeletehin Karang dedampingnya.
2. Prade wenten asapunika, patut sang madruwe Karang kapakelingin antuk I Prajuru Banjar, dipradene sang madruwe Karang nenten ngebah wiadin ngingsiran tanem tuwuh wiadin wewangunan sane naonin patut I Prajuru melaksana manut Dresta nyepat gantungin sepatutnya.
3. Pikolih-pikolih nyepat gantung punika kekuasa olih I Krama Banjar miwah Prajuru sane melaksana manut pah-pahan miwah Pararem.
4. Tanem tuwuh wiadin wewangunan sane sinanggeh ngerawuhan alabaya ring pengadinya, sang pengadin patut digelis meweh painget ring sang madruwe tanem tuwuh wiadin wewangunan inucap, tur matur ring Prajuru, Prajuru patut meweh pamutus.

5. Tanem pakarangan utawi Sanggah/Pemerajan, sane sampun manut Sasukatan, nenten kangkat jagi pah ngange senger tembok pewaris.
6. Yaning pamutus Prajuru kalempasing tur prade jantos wenten alabaya, Sang Lempas patut kedanda agung alitnya manut sane karusakang miwah Pangupakara.
7. Pradene parindikan inucap ring ajeng jantos ngewatuang jiwa baya, indik punika katur ring Sang Rumawos ( Pemerintah )
8. Ritatkala notor, munggul, wiadin ngebah pamulan-mulaan raris mayanin wewangunan anak lianan, sang notor, munggul, wiadin ngebah punika patut negen sekancan prabiya karusakan miwah prabiya Upakara Pemerasiswaan.

### **PAWOS 22**

1. Tan wenang nanem wiadin ngeseng Sawa ring Karang Paumahan.
2. Taler tan dados makta/ngenahang barang sane cinanggeh ngeletehin ring Karang Paumahan, bilih-bilih yan kaletehane ngelantur sinanggeh barang-barang sane pecak keangge ring Setra/Tunon ring kewentenan upacara Atiwa-tiwa, sejeroning barang-barang sane keangge ring upacara luire :  
Wanci, Sok-sokan, Pengangge manut dresta.
3. Yening wenten Sang Sadhaka jagi kageseng kangkat ngelaksanayang upakara ring tanah sane marupa Palemahan Desa, mekadi Tegal/Sawah, ring wusan taler kawentenang upakara.

### **PALET 8**

#### **Kasucian lan Kasukertan Desa**

### **PAWOS 23**

1. Prajuru Desa tan maren nuntun Krama Desa mangda kasucian Desa lan kasukertanyane sida ajeg.
2. Sang Katitenin, sahanan pemargi yapa berana, sane sinanggeh Duskerta miwah ngeletehin Desa.
3. Duskerta lan leteh luire:
  - a. Salah timpal ( Jadma mesangga ring Buron ).
  - b. Penguman-penguman ring saba
  - c. Miwah sehanan sane sinanggeh ngeletehin manut linggih Agama, bilih-bilih ngalepasin Pawos 5, Palet 2, Sarga I, Awig-awig puniki.
4. Sang kacihna melaksana kadi ring ajeng, patut kasisipang antuk pamidanda wiadin Marisudha Desa, sepatutipun manut Pararem.

5. Yaning wenten sinalih tunggil Krama, wiadin Warga Desa merasa keletehin sangkaning sinalih tunggil Sang melaksana angawe Duskertaning Desa, Sang merasa katatahan dados nunas bebawos ring Sang Rumawos ( Pemerintah ), yaning patut sane ketiwakang olih Prajuru Desa, nenten merasa tinas apadang, katerima ring manah Sang merasa ketetahang inucap.

#### **PAWOS 24**

1. Prajuru nuntun mangda sehanan Upakara-upakara Desa Pakramane sida kemanggehang saka sidhan, agung alitnya mutang ring kawentenannya.
2. Prade wenten cihna Kadurmangalan Jagat, nunasang ring sang Sadhaka.

#### **PAWOS 25**

Upakara-upakara berataning taler patut keajegang, Prajuru nuntun saha medabdabin mangda Desane sida treptining sipeng amati geni, Wong Desa sami atuang minutin.

#### **PAWOS 26**

1. Prajuru Desa taler patut nuntun I Krama Desa, mangda kasukertan Desane setata sida ajeng.
2. Luir sane patut katinutin:  
Sehanan wewatesan Tanah, Marga, Karang Paumahan, Tegal, Setra, Pahyangan, Tembok, Pagehan, Pundukan, miwah sane siyosan.
3. Sang kecihnaan ngerusak, patut katiwakin pamidanda sepatut ipun.

#### **PALET 9**

### **Dusta, Bhaya lan Lalumburan.**

#### **PAWOS 27**

1. Sehananin Warga Desa prade uning wenten Jadma melaksana dusta patut digelis utawi para mangkin atur uning ring Prajuru.
2. Laksana sane sinanggeh dusta kecaping luire:
  - a. Jiwa bhaya.
  - b. Artha bhaya.
  - c. Geni bhaya.
  - d. Palagandangan.
  - e. Duracara ring Agama.
3. Sang uning inucap patut di gelis nyuarayang Kukul Banjar manut ring rupan pelaksanaan punika.

### **PAWOS 28**

1. Krama Banjar/Desa adat sane sampun mireng suaran Kukul patut digelis mapitulung saha gegawan sane manut keangge, sane kacihnayang antuk suaran Kukul punika.
2. Sedurunge wenten embas saking Prajuru, Krama Banjar nenten dados budal nyantos gagetikan miwah siaran-siaran sane kelaksanayang olih Prajuru.

### **PAWOS 29**

Warga desa sane kaicalan/kemalingan prade pacang masaserep patut nunas bebawos/kebebasan miwah panuntun ring Kelihan Banjar, miwah Sang Rumawos ( Pemerintah ).

### **PAWOS 30**

1. Sehananan Warga Desa prade polih nuduk barang utawi jinah, patut uningan ring Kelihan Banjar/Desa.
2. Kelihan Banjar/Desa inucap nyiarang ring Banjar, indik barang dudukan punika mangda Sang Madruwe sida mewantun ngamolihang barangnyane.

### **PAWOS 31**

1. Sahananan Warga Desa sane miara sekaluwire wewalungan, patut siaga nitenin, negul wiadin ngelogorin mangda nenten ngerusakin Karang wiadin Abian anak siyosan.
2. Prade wenten wewalungan ngeleb saha ngeranjing ring Pakarangan anak siyosan Sang Madruwe karang patut malungguhang ring Sang Madruwe wewalungan punika.
3. Bilih yaning wenten ngewentenang kerusakanan patut katur ring Prajuru, mangda katiwakin pamindada manut dosanya.
4. Bilih jantos ping tiga sampun malungguang wenang taban, tur kauningayang ring Prajuru.
5. Wewalungan sane ketaban wenang katebus olih Sang Madruwe, ageng alit panebusnyane kepastika olih Kelihan Banjar/Desa adat.

### **PAWOS 32**

1. Prade wewalungan sampun ngeleb ngeranjing ke Khayangan, Sang Madruwe wenang kasisipang antuk pamidanda manur Dresta.
2. Yaning wewalungan ring Pura/Desa wenten karusak, sajawaning prabiya Upakara Pamarisudha taler keni prabiyaning mecikang wewangunan sane karusak.

### **PALET 10**

#### **Wicara**

### **PAWOS 33**

1. Sane wenang mawosin minakadi mutusang wicara ring Desa luwire :
  - a. Kelihan Banjar, prade Sang Wicara tunggil Banjar.
  - b. Kelihan Desa Adat, prade Sang Mawicara metiyosang Banjar.
2. Pamutus Kelihan Desa Adat arep ring wicara inucap ring ajeng sinanggeh Wesananing bebawos ring Desa.

### **PAWOS 34**

1. Sahanan sane mewiwit kacorahang sakaluwire, miwah sinanggeh nungkasin daging Awig-awig, Paswaran, miwah Pararem Desa wiadin Banjar patut digelis kabawosin tan nyantosan pasadok.
2. Sajawaning wicara kadi ring ajeng, patut nyantosang pasadok Sang Nunas bawos.

### **PAWOS 35**

1. Sahananin wicara patut katepatin jantos pastika janten uning iwang patutnya melarapan antuk Tri Premana ( Iikita, Saksi, Bukti ).
2. Pamutus tan maren nepak ring Catur Dresta :
  - a. Purwa Dresta.
  - b. Sastra Dresta.
  - c. Loka Dresta.
  - d. Desa Dresta.Sane sampun kasungkemin antuk Krama Desa.
3. Sahanan pamutus patut tan maren ngupadi :
  - a. Mangda warga Desa sayan pastika uning ring wewates, iwang miwah patut.
  - b. Mangda Sang Kawon tatas uning ring keiwangannya.
  - c. Sang Molih tan maren katuntun tan nginggilang kepatutannya. Lila legawa ngampurayang Sang Sisip.
  - d. Nyasap bibit-bibit papinehe sane sumpelan (Mamusuh-musuhan ).

**PAWOS 36**

Kelihan Desa Adat patut nunasang ring Sang Rumawos ( Pemerintah ), yening wenten Warga Desa amandel keputusan Prajuru, sane sinanggeh ngawinang Kaduskertaning Desa, wiadin ngelethin.

**SARGA III**

**SUKERTA TATA AGAMA**

**PALET 1**

**Khayangan**

**PAWOS 37**

1. Ring wewidang Desa Adat Mas, wenten Khayangan-khayangan sane sinanggeh Khayangan Panyiwian Desa luwiripun :
  - a. Pura Khayangan Tiga : Pura Puseh, Pura Desa, Pura Dalem.
  - b. Khayangan Pura Manca Desa.
2. Sane sinanggeh Pura Khayangan Tiga, sane wenten ring Desa Adat Mas inggih punika :
  - a. Pura Dalem.
  - b. Pura Puseh.
  - c. Pura Desa.
  - d. Pura Dalem Kacang Bubuan.
  - e. Pura Dalem, Juga.
  - f. Pura Puseh, Juga.
  - g. Pura Dalem Jantur.
3. Sane sinanggeh Khayangan Manca Desa, sane wenten ring Desa Adat Mas inggih punika :
  - a. Pura Pasakonon ( Sakenan ).
  - b. Pura Dalem Pangelan.
  - c. Pura Bongli
  - d. Pura Bukit.
  - e. Pura Buk Jambe.
  - f. Pura Pekaseh ( Kasih ).
  - g. Pura Panegalan ( Megalan ).
  - h. Pura Taman Pule.
  - i. Pura Ponambenan.
  - j. Pura Pasek.
  - k. Pura Manik Segara.
  - l. Pura Penataran Kacang Bubuan.
  - m. Pura Tandruh.

4. Indik pedum pengamong Pura Khayangan Tiga/Pura Manca Desa, kawentenang Pemaksan-pemaksan pengamong sane ngelaksanayang pewangi-pewangi miwah miana merupa emponan, manut dresta tetamian ( Pewarisan ).
5. Tatacara pangempon Penyiwian lan panyungkeman punika pateh ring tatacara pedum ngagge Setrane, sane sinanggeh Setran Pura Dalem inucap suang-suang.
6. Sejabaning sane Pengempon inucap ring ajeng, ring Pura Desa nenten kawentenang giliran ritat kala ngaturang Pujawali, keamongin antuk Banjar Suka Duka manut pah-pahan.

### **PANOS 38**

1. Prajuru-prajuru patut nuntun ngenterang Krama Desane ngemanggeh-gemanghang kesucian Khayangan Desane, miwah sane siyosan sane magenah ring wewidangan Desa Adat Mas.
2. Sang Pengamong/Pemaksan Pura-pura Khayangan Desa nenten magingsir genah kantun taler ring genah pewarisnya, manut dresta sejabaning, yaning nyeburin nyentana ring pewaris siyosan tur sampun kapastika ring Prajuru Desa.
3. Bacakan sane kewastanin leteh cendale sane tan dados ngeranjing ring Pura Khayangan-khayangan Desa Luwire :
  - a. Jadma Luh sebel kandel sakaluwire : Ngeraja sewala, madruwe Oka karuron, manut sengker.
  - b. Sehananin Jadma Patita luwire :  
Panak Bebinjat, Wong Beling kasenggaman tan sinangaskar, Wong memitra ngalang, Wong Buduh, Wong sakit Ile, miwah cendala-cendala lianan, sadurung kalukat kaprayascita manut Agama.
  - c. Jadma Cuntaka sangkaning kaluwarganya seda/padem.
  - d. Jadma sane kapastika panten manut pamutus paruman Prajuru lan Parisadha Hindu Dharma.
  - e. Sato agung wiadin wewalungan ngawit Bawi miwah sane agengan sejabaning kalaning Apapada.
  - f. Sahananing barang sane sinanggeh letuh manut Agama luwire :  
Tulang, Getih, Bok, sakaluwire wiwitan Sawa wiadin Watang layudan Pitra Yadnya lan sepanuggalan ipun, miwah sane siyosan.

4. Ring Khayangan tan dados ngelaksanayang sehanan laksana sane sinanggeh ngeletuhin luwire :
  - a. Mamisuh kalih wak parusya siyosan.
  - b. Mapaiyeg wiadin magerengan, jantos kanin ngamedalin Rah.
  - c. Mekbotan, Mewarih, Mesanggama, miwah prewertine ala siyosan.
  - d. Sehananing sane nenten nganutin ktreptian miwah kasucian ring Khayangan.

#### **PAWOS 39**

1. Krame Desa sane memanggihin wiadin uning mungguing wenten Jadma melaksana ngeletuhin Khayangan kadi munggah ring ajeng, patut matur ring Prajuru.
2. Prade tan wenten nyadokan, wenang kasisipang sawireh sinanggeh ngeromonin corah.

#### **PAWOS 40**

1. Prajuru patut mastikayang Pemangku-pemangku sane kengin munggah tedun ring Palinggih-palinggih Khayangan, miwah ngiyasin Prelinggannyane.
2. Sejabane sang kapastika kadi ring ajeng, sapa sira tan dados melaksana munggah tedun ring Khayangan.
3. Taler patut kapastika indik Sang Wenang nyanggra wiadin nyalukin Tapakan-tapakan wiadin Ilen-ilen, sane patut kapingitan kesuciannyane, minakadi : Barong, Rangda miwah sane siyosan, sedurunge nyalukin kawentenang Pamarisudhan.
4. Pemangku-pemangku Khayangan Desa kesangaskara wiadin Kawintenang antuk Krama Desa, asapunika upakara Pitra Yadnya ring sedana ke pungkur, nyelenggarayang keserahin ring Krama Banjar suka duka genahnya Mebanjar.
5. Pemangku-pemangku sane kasungkemin antuk Krama Desa sagerehan inggih punika Pemangku-pemangku Khayangan Tiga nganutin lungguh sane kapstika antuk I Prajuru.
6. Prajuru Desa tan maren semeken nuriksa mangda I Pemangku ring ajeng nganutin tata kramanyane wiadin tegeg kesuciannyane.

#### **PAWOS 41**

Prajuru Desa adat Mas, mastikayang indik aci-aci ring Khayangan Desa manut Dresta luwire :

- a. Pujawali pengingkupan ngetahun sepisan.
- b. Pujawali sesepan taler ngetahun apisan, sejabaning Desane keletehan ( Kecapatan ).

### **PAWOS 42**

1. Khayangan-khayangan Panyiwian Desa sane keamong antuk Pemaksan siyosan ring Khayangan Tiga, tata caraning kesucian taler kadi tata caraning Khayangan Tiga, sejawaning sane mula wantah madruwe kerihinan Dresta siyosan.
2. Yan manut kadi tata caraning ring ajeng, Prajuru Desa patut mitegesin Pengamong-pengamong miwah Pemaksan-pemaksan sane nyelenggarayang sahaluan ring tata cara ring ajeng.

### **PALET 2**

#### **Pawikon utawi Guru Loka**

### **PAWOS 43**

1. Sang pacang Mapudgala utawi Jati, sejabaning nunas panugrahang ring Sang Rumawos ( Pemerintah ), patut masadok ring Kelihan Banjar lan Kelihan Desa.
2. Prajuru inucap patut sareng nitenin kecap Agama, tur nureksa mangda sulur pemargine jati patut, sane patut katureksa pinih riyin kecedangan miwah kasucian pelaksanaan kehidupannya.
3. Prade wenten kantung sinanggeh cemer, Prajuru inucap patut atur uning ring Sang Rumawos mangda panugrahan Sang Rumawos sida jati manut ring kecap Agama.
4. Prajuru Banjar/Desa inucap patut sareng nyaksinin pemargin upakarannya.
5. Sepatutnya, Prajuru patut ngutsahayang mangda parab Sang Diniksan ring sehanan Ilikita kagentosin antuk Biseka Kewikon manut panugrahan Nabenyane, saha nyiarang ring peruman Banjar miwah Desa.

### **PAWOS 44**

1. Prajuru patut nuntun saha ngemanggalaning Krama Desane ngawas nitenin sapemargin para Wikune ring sewewidangnya pemuat mikukuhin kesucian linggih Ida.
2. Kelihan Desa Adat patut digelis atur uning ring Nabenyane prade wenten kecihnan Wiku sasarin laksana.
3. Atur piuning ring ajeng patut kadulurin cihna anut ring Tri Premana inggih punika : Ilikita, Saksi, Bukti.
4. Prajuru tan wenang lumaksana metetiwak pemutus ring Sang meraga Wiku.

### **PANOS 45**

1. Sang pacang mawinten miwah Mapudgala, maka buatan pacang memargi Ngemangkunin, Nyonteng, Dalang miwah sakaluwire patut masadok ring Kelihan Banjar miwah ring Kelihan Desa Adat.
2. Prajuru inucap patut nitenin ngawasin mangda pamargine manut ring kecap miwah Dresta.
3. Yaning wenten Krama Desa sampun pastika ngemedalang bawos Wakparusya, mekadi Memisuh miwah sane siyosan patut kakenenin pamidanda manut Dresta, yaning Sang katibenin punika minakadi :
  - a. Prajuru Desa/Banjar.
  - b. Pemangku-pemangku Khayangan Desa utawi siyosan.
  - c. Sang Sedhaka
  - d. Sang Tri Wangsa.
4. Prajuru Banjar miwah Desa patut sareng nyaksinin upakara Sang Mediksa, Mawinten utawi Mapudgala, tur sepatute gelis kasiarang ring Krama Banjar/Desa.
5. Daging siaran punika tegap rawuhing bates-bates kewenangan penganter Yadnyane sane dados kemargiang manut Dresta

### **PANOS 46**

1. Krama Desa sami patut sareng ngawas nitenin katuntun olih Prajurune mangda sahanan Yadnya sane kewentenang kaicen pemuput olih Sang Sulinggih wiadin Sang Sucana, Pemangku sakeluwire, manut dudonan kadi kewenangannya manut Dresta.
2. Prade wenten ngelempasin, bilih-bilih sane pastika nyumukan, manut Prajuru wenang ngalangin wiadin ngurungang yadnya inucap.
3. Prade ketelanjur yadnya saha pala-wesananya sinanggeh tan wenang pastika.
4. Sang ngelempasin utawi dustannya patut katiwakin paminda olih Prajurune manut dresta.

### **PALET 3**

#### **Tunon/Setra miwah Atiwa-tiwa**

### **PANOS 47**

1. Sang pacang ngangge Tunon/Setra, patut nunas kebebasan ring Kelihan Desa, saha tatane nganggen manut kadi Dresta miwah pituduh Prajuru.
2. Wong Desa sami patut nitenin mangda sahananin letuh Setrane nenten ngelalah wiadin kebakta ke Desa Pakraman, bilih-bilih ke Parahyangan.

3. Prade wenten Sawa sane pacang kependem, wiadin kegeseng, ring patut pemargine ke Setra mangda katitenin, Banjar Suka Duka mekekawin mebusan Kampuh/Selempot, pemargine trepti nenten dados angira-ngira Sawa, Prajuru patut mitetesin Krama Banjar, mangda sida trepti kadi ring ajeng.
4. Pekaryan Atiwa-tiwa wiadin ngupakara Sawa patut kepeserah ring Krama Banjar Suka Duka.
5. Banjar Suka Duka sumakuta nyanggra, wiadin ngewehin kebebasan manut Awig-awig luwire:
  - a. Pekaryan Atiwa-tiwa kesanggra 3 ( Tigang ) warsa apisan sane kasungkemin antuk pawedal merupa Pepatusan, luwire.
  - b. Reramuhan , Pedagingan, miwah sane tiyosan sane sampun kararemin manut Dresta.
6. Yaning wenten Krama Desa pacang ngawentenang pekaryan Atiwa-tiwa kirangan ring sengker kadi ring ajeng, Krama Banjar nenten ngemedalin Pedagingan miwah Reramuhan.
7. Sang Atiwa-tiwa kangkat nunas kekaryan sapupute ring Krama Banjar Suka Duka, Krama Banjar patut nyumgkemin kadi pinunas ring ajeng, tur ngelaksanayang jantos puput manut Dresta.
8. Indik Pasangun Krama Banjar kantun ajeng kadi Dresta, sejawaning wenten perubahan saking Krama Banjar sane sampun kasungkemin sareng sami.

#### **PANOS 48**

1. Sakaluwire Papendeman ring Tunon/Setra, patut kedagingin pinget maka cihna Papendeman punika kari keelingan antuk Keluarga Sang Padem/Seda punika luwire.
2. Pinget Pendeman punika :
  - a. Pekaanan Paran
  - b. Pekaanan Bata
  - c. Pekaanan Batu sanistanya dados Paras atebih, tengahnya Limang cangkang saking watar Setra.

### **PAWOS 49**

1. Sakaluwire Papendeman sane mapinget tan dados kagagah, kasusunin miwah katempongin.
2. Sakaluwire Sang Mamurug patut ketiwakin pemedanda manut perarem.
3. Ritatkala ngagah Sawa yan wenten warga Desa ngeniang Bekel miwah Bebaktan Sawa punika patut nguningayang ring Sang madruwe Sawa, tan dados keambil.
4. Yang kecihnan wenten ngambil Bekel miwah Bebaktan Sawa Punika patut Sang ngambil punika ngewaliang nikel ping tiga ring Keluarga sang adruwe Pendeman punika.

### **SARGA IV**

#### SUKERTA TATA PAWONGAN

#### **PALET 1**

#### **Tata Treptining Pawongan**

### **PAWOS 50**

1. Yaning wenten warga Desa madruwe Putra, mesengker tigang ( 3 ) rahina patut masadok ring Kelihan Banjar Suka Duka.
2. Yaning wenten Sudra wangsa ngamedalin Putra Buncing, sinanggeh ngeletuhin Desa Pakraman, ring wewidangan Desa Krama patut ngawentenan Pemerayascitaan/Pecaruan, miwah ring Paumahan Sang Katiban halangan punika, Sebel Desa kaambil manut ,Nista, Madya, Utawi luwire : 3, 7, 12, 42, sadurunge embas Pujawali ring Khayangan nenten kemargiang.
3. Prajuru Banjar/Desa inucap ngunggahang ring Sang wawu embas punika ring Ilikitan Banjar Suka Duka.

### **PAWOS 51**

1. Yaning wenten Krama Banjar Kelabuh bahangan wiadin ketiben alang Kepademan masengker asilid patut mesadok ring Kelihan Suka Duka miwah Bendesa Adat.
2. Yaning durung polih pamutus sakeng Kelihan Desa Adat, tan dados melaksana mendem Sawa.
3. Yaning Jadma Alit durung maketus nenten malih memilih dewasa pacang mendem

**PALET 2**

**Busana Adat**

**PAWOS 52**

Busana adat kapatut sekadi ring sor puniki :

- a. Suka duka ngangge Wastra kalih Selempit.
- b. Kundangan ngangge Wastra, Kampuh lan Destar.
- c. Muspa ngangge Wastra, Kampuh lan Destar.
- d. Pauman ngangge Wastra kalih Selempot.

**PALET 3**

**Ngererod/Ngerangkat**

**PAWOS 53**

1. Yaning sinalih tunggil wente Krama Desa mapawarangan sangkaning pada Lila, maletan aselid Sang Madruwe Anten patut mesadok ring Prajuru Banjar/Desa.
2. Prajuru Banjar meretiyaksa nganutin pasadok punika, yaning sampun pastika makekalih, Daha Truna sayuwakti pada Lila Perorodan punika dados magenah sejeroning wewidangan Banjarnya.
3. Yaning Pangerorodan tan pada Lila, sesampun kapiteges antuk Prajuru Banjar, Prajuru Banjar nenten meweh pasayuban ring genah wewidangan Banjarnyane.
4. Bilih pemargine sampun nepek ring Dresta, Sang Ngerorod miwah sane nampi, polih mapikukuh pesayuban Banjar miwah Prajuru Banjar.
5. Prade pemargine tan manut Dresta, Sang Ngerorod miwah sane nampi kesisipang Prajuru patut digelis malasang, Sang kenira-kira katetehan, kewehin Pesayuban ring I Prajuru, miwah matur ring Sang Rumawos.
6. Prajuru gelis nguningayang ring Sang Rumawos, mangda ngerawuhang ring Kulawargan Sang Ketetehan.
7. Krama sane nampi patut katetes, yaning saruron ring, Corah punapi malih nyarengin misekeyang, wenang danda agung alitnya manut pararem.

## PANOS 54

1. Sang Paserep sane pacang netes Perorodan patut nunas panuntun ring Kelihan Banjarnya, saha surat Embak-embakan Sang Rumawos ( Pemerintah ), bilih-bilih Paserep punika saking siyosan Desa Adat taler patut nunas Embak-embakan ring genah Sang kerawuhin.
2. Prajuru natasang pisan ring Sang Maserep punika, sekaluwire :
  - a. Maserep kalaning wengi
  - b. Nenten makta surat Embak-embakan saking Pemerintah
  - c. Tan dados makta sakaluwire senjata, wiadin siyosan sane mahayanin.
  - d. Tan ngeranjing ke Paumahan Sang Ngerorod akehan ring Kalih ( 2 ) diri, Sang Wirang miwah Sang Sinanggeh Prajurunya.
  - e. Senapake ring Paumahan, mangda tata cara Penetesan trepti, maka buat Sang Istri mangda polih nerangang idepnya, sangkaning jati, nenten ketetehan.
  - f. Sang Maserep mangda tatas miragi ucapan anake Istri sane ketetes punika, luwir pidabdabe Inggih punika :
    1. Anake Istri kegenahang ngeraga, tan dados anak siyosan nampek sejeroning tigang depa, tur genahnya sinah.
    2. Prajuru nyumakutayang ring Sang Istri pacang ngicen pasayuban manut ring sedaging idep Sang Istri sane ketetes.
    3. Yaning pada lila Parorodane, Sang Maserep patut katulakang, yaning sangkan kepaksa anten, punika patut kepalasang.
    4. Yanig wenten Daha ical ritatkala wengi tur nenten wenten pelikuan, Sang Madruwe daha punika, sadok ring Prajuru Banjar meletan 3 ( Tigang ) rahina saking icalnya daha punika, patut nyuarayang kulkul Banjar pacang nyerepang daha punika.
    5. Yaning kapastikayang daha punika kepaksa, wiadin kepelegandang, peremangkin patut sadok ring Prajuru tur nyuarayang kulkul jagi nyerepang daha punika.
    6. Sang angamet daha inucap patut sayaga ngawentenang palukuan ring Sang Madruwe daha selantur ipun ngewentenang pasewakan manut Dresta jantos ping tiga.
    7. Yaning jantos ping tiga pasewakane punika kemargiang tampi tan ketampi, kepastiang pasewakan punika sampun puput, tur mangda kesaksinin antuk Kelihan Banjar Sang Madruwe daha.

### **PANOS 55**

1. Sang Palas makurenan patut masadok ring Kelihan Banjar.
2. Pasadok ring ajeng kadulurin antuk keterangan pastika, nganinin indik pengelaksana, umpami :
  - a. Sangkaning pada lila mepalas.
  - b. Wenten cinaroda, miwah sane siyosan.
3. Prajuru Banjar mitetesin indik punika minakadi :
  - a. Pah-pahan gunakaya
  - b. Tataning pangupajiwa Okan-okanya
  - c. Bobotan kantong ring Angga
  - d. Pah-pahan Okannyane.
4. Palas merabian punika sane kebawos, sami-sami pada lila legawa yaning wenten mawiwit wicara katur ring Rumawos ( Pemerintah ).
5. Palas alaki Rabi sane sampun kepastika patut tur kesaksinin antuk Kelihan Banjar ring patemuan Paruman Banjar.

### **PALLET 4**

#### **Pawarangan miwah Pakulawargan**

### **PANOS 56**

1. Prajuru patut maritetes Pewargan punika, prade pemargine sampun manut Dresta, Prajuru meweh pasayuban sepatutnya.
2. Prade tan manut, Prajuru patut ngicenin penuntun larapan pemargine sida manut tata cara.
3. Pawargane sane kepastika salah tingkah manut Agama luwire :
  - a. Asu mundung ( Sang Sudra ngamet Istri Sang Tri Wangsa )
  - b. Angelangahin Karang Ulu ( Sang Satria ngamet Istri Sang Brahmana ), sadurunge kewentenang upakara Pati Wangi, marupa panyusudan Wangsa, ring Desa Adat Bale agung, nenten kangkat kewentenang upakara Widhi Widhana seantukan keni bacakan Patita, tan dados ngeranjing ring Khayangan-khayangan Pasucian Desa.
  - c. Masemeton Tunggil miwah Ibu miwah Aji.
  - d. Kapernah Ibu Tumin antuk Sang Lanang.
  - e. Ngambil Ibu rawuhing Putranya, patut kesahang asiki sane ambil ungkuran.
  - f. Ngambil Putra Dia/Ibu wit Aji miwah Ibu masemeton.
  - g. Ngambil Daha kekalih apisanan, patut seka siki welat sengker asasih pitung rahina.

4. Yaning Pawarangane lempas ring kecap Agama luwire : patut Prajuru ngurungang miwah malasang Pawargane punika, sane kepastika luwire : Semeton Dicambara, wit Ibu Tunggal Aji kekalih.
5. Ungguhan Kayikane kadi ring sor puniki patut kapiteges antuk Prajuru luwire :
  - a. Ligika Sanggraha mapiteges Deha teruna sesenengan kewanten tan mewiwaha.
  - b. Salah Krama, masesenengan arep ring Buron.
  - c. Drati Krama, salah sinunggil Teruna masesenengan ring Istri/Rabin Sang Mapikuren.
  - d. Paradara, salah sinunggil Deha masesenengan ring Lanang sampun Mapikuren.
  - e. Mamitra Ngalang, salah sinunggil Balu wiadin Nyapian masesenengan tan mawiwaha.
6. Ring Panemayan upakarannya Ngewidhi Widhana Prajuru Banjar/Desa patut katurin Nodiya antuk Sang Madruwe pewarangan, maka Saksi Utama.

#### **PAWOS 57**

1. Sinalih tunggil yan wenten Warga Desa pacang ngidih Sentana, patut masadok ring Prajuru Banjar, asasih sedurung Dewasa Pemerasan.
2. Prajuru Banjar patut nyiarang ring Krama Banjare saha ngaturang ring Kelihan Desa Adat, mangda kesiarang ring wewidangan Desa Adatnya.
3. Yaning sinalih tunggil wenten Warga Desa merasa keberatan ring Pemerasane punika, mesengker a uku ( Pitung Rahina ) sadurung dewasa Pemerasan, patut nunas bawos ring Kelihan Desa.
4. Kelihan Desa mapiteges Sang jagi keparas, indik kekulawargan marep ring Sang Memeras, saha meweh pamutus bawos nganutin Dresta.
5. Yaning Tata Pemerasane sampun puput Dresta, Prajuru Banjar meweh pesayuban, larapan Widhi widhananya sida kelaksananya tur kesaksinin antuk Prajuru Banjar/Desa.

#### **PAWOS 58**

Prade pemerasane tan manut Dresta, tan manut ring sapituduh Prajuru Desa Adat, Kelihan Banjar patut ngandeg Sang pacang mekarya mangda puputang riin bebawosane, miwah sulur sane siyosan.

### **PAWOS 59**

1. Sehananing Krama Desa ngerobang wiadin ngajak anak siyosan lepas ring Drestaning Pakulawargane umpami :
  - a. Ngajak Wong duduk-dudukan.
  - b. Jadma mulih saking makurenan.
  - c. Jadma mesundulan dewek.
  - d. Rowang pastika jenek, miwah sane siyosan, patut atur piuning ring Kelihan Suka Duka ( Kelihan Banjar ).
2. Yaning Sang Ngundulang kadi ring ajeng, nenten wenten pesadok ring Prajuru Banjar/Desa nenten wenten pasayuban ring Sang Padunungan punika.
3. Krama Sane Ngajak wiadin Ngerobang, patut tanggung Samakuta, negenang lampah Sang Keajak, arepe ring kesukertan Banjar/Desa.

### **SARGA V**

#### **PAMIDANDA LAN PERAMPAGAN**

#### **PALET 1**

#### **Pamidanda**

### **PAWOS 60**

1. Desa wiadin Banjar wenang niwakang pamidanda ring Warga Desa sane sisip.
2. Tetiwak punika kelaksanayang olih Kelihan Desa Adat, wiadin Kelihan Banjar Suka Duka manut dudonan.
3. Bacakan pamidanda punika luwire :
  - a. Ayahan Punukun kesisipang.
  - b. Denda Artha.
  - c. Penikel-penikel Urunan wiadin penikel-penikel Dedendan.
  - d. Upakara Pengaskara.
  - e. Kenoroyang, kewusang Mekrama Desa/Banjar.

### **PAWOS 61**

1. Pamidanda sane ketiwakang patut manut ring daging Awig-awig, Pesuara, Perarem, Wiadin Dresta miwah Agama.
2. Agung alit pamidanda sane ketiwakang mesor singgih manut kesisipan.
3. Jinah miwah Raja Brana wit pamidanda punika ngeranjing dados druwen Desa/Banjar.

**PALET 2**

**Rerampagan**

**PAWOS 62**

1. Krama sane langkungan ring Tigang sasih amandel wiadin negungin Urunan, Dedendan, wenang Kerampag.
2. Tatacara ngerampag patut mari kadi ring sor :
  - a. Kelaksanayang olih Prajuru-prajuru kesarengin Krama Banjar.
  - b. Sang Kerampog tan dados ngalangin, Sang Ngerampog saha sareng nyaksinin pemargin Sang Ngerampog.
  - c. Sang Ngerampog sangkaning darsana ngambil barang-barang rerampagan sane mepengarga saih ring utangyane.
  - d. Prajuru mapiteken mangda nebus barang-barang rerampagan suwenya mesengker 3 ( Tigang ) rahina, yaning tan katebus manut sengker, barang-barang rerampagan dados kelelangan.
3. Rerampagan kasengkerin mangda sampunang jantos :
  - a. Nganinin barang saluwire sane keinggilang manut Agama.
  - b. Ngicalang teges Kemanusan.
  - c. Mademang usaha pengupa jiwa Sang Kerampag.

**SARGA VI**

**PARAREM MIWAH PASUARA**

**PAWOS 63**

1. Pararem-pararem sane keangge mitegepin Awig-awig nunggal-nunggal manut dudonan patut kemedalang, mejalaran Paruman Desa/Banjar.
2. Daging sehanan Pararem patut seeloan ring daging Awig-awig.
3. Sane patut kaunggahang ring Pararem inggih punika :
  - a. Dewasa ngawitin pemargin Awig-awig sane mebuat.
  - b. Agung alit Penikel-penikel, Danda-danda miwah siyosan.
  - c. Tata Sulur ngemargiang daging Awig-awig.
  - d. Sehanan indik-indik siyosan, minakadi keanggen mitegepin Awig-awig.

### **PANOS 64**

1. Paruman Prajuru wenang ngemedalang pasuara-pasuara anggen mitegepin daging Awig-awig.
2. Daging pasuara tan maren patut ;
  - a. Seeloan ring daging Awig-awig.
  - b. Manut ring Adat, Agama, Sastra, Purwa, Loka miwah Desa Dresta.
3. Nguenin Awig-awig Desa/Banjar Adat puniki kelaksanayang antuk Pararem Desa/Banjar wiadin ngirangi taler mejalarana antuk pasuara pastika, saha kdasarín antuk pikayunan gilih Selulung Sebayantaka.

### **SARGA VII**

#### **PAMUPUT**

### **PANOS 65**

1. Kelihan Desa Adat ngemargiang sedaging Awig-awig miwah usaha Desa, tan maren :
  - a. Seeloan utawi mewirama ring sehana Prayoga, sane sinanggeh pemucuk-pemucuk ring Krama Desa/Banjar.
  - b. Ngawentenang embas-embasan ring Warga Desa mangda tan santulan ngupadi pengupa jiwa nanging kdasarín antuk Pararem.
2. Sane kepastika kangkat majegin ayah-ayahan antuk jinah inggih punika :
  - a. Pegawai-pegawai Pemerintah sane kepastika wenten surat-surat mekadi piteges.
  - b. Pegawai sane kepastika sampun wusan, tur nenten kanton ngeranjing serahina, patut malih tedun manut ring ayah-ayahan Desa/Banjar.
3. Awig-awig Desa Adat puniki kelingga tanganin antuk :
  - a. Kelihan Desa Adat.
  - b. Kelihan Banjar suka duka minakadi ngewakilin Krama Banjar suang-suang, maka cihna sedaging Awig-awig puniki sampun pastika tinas keraremin antuk Krama Desa Adat sewewidangnya Desa Adat Mas.
  - c. Perbekel Desa Mas, lan Camat Ubud ngelingga tanganin minakadi Saksi.
4. Katur ring Bapak Bupati Kepala Daerah Kabupaten Gianyar, mangda nureksa kalih ngelingga tanganin, maka Murdaning Pamikukuh.

**PANOS 66**

1. Sedaging Awig-awig puniki kemargiang ring rahina : Soma Kliwon, Wuku Uye, Tahun Icaka 1899.

Luwir sang ngelingga tanganin :

1. Kelihan Desa Adat Mas  
Ttd  
( I Made Wedja )
2. Kelihan Desa Adat Banjar suka duka :
  - a. Banjar Batanancak  
Ttd  
( I Wayan Munjuk )
  - b. Banjar Tarukan  
Ttd  
( I Ketut Rentih )
  - c. Banjar Kawan  
Ttd  
( I Wayan Selem )
  - d. Banjar Satria  
Ttd  
( A.A. Putu Sumbawa )
  - e. Banjar Juga  
Ttd  
( I Made Duria )
  - f. Banjar Bangkilesan  
Ttd  
( I Wayan Salin )
  - g. Banjar Tegalbingin  
Ttd  
( I Wayan Gejor )
  - h. Banjar Kumbuh  
Ttd  
( I Nyoman Bakti )